

枕碧樓叢書

第十三冊

日本舊鈔本

花

谿谷

集

吳興沈夢麟花谿集序

昔人謂立言而朽君子不由也然則君子之所由其有
要乎噫難矣哉先輩之人學博而用周資深而積厚得
志於時有所敘述諷詠典則之製成和平之音著間或
酬應無故道焉不得志而隱約於下亦率時是以自表
見士林傳之後生仰之槩諸平生未嘗規規著述而垂
聲文苑則擬之立言可也謂之不朽亦可也雖然抑有
幸不幸存焉竊觀往世唐宋之文盛矣大家顯人昭昭
可數其他刻意文章篇目浩瀚具在藝文等志孰能盡

見之哉蓋并其初稿而亡者多矣譬諸斷梗漂木泛泛
煙海雲濤之間非無美材異質然倏蕩散莫知所之其
有沈沒沙石久而獲出因有居士之題假山之號豈非
幸哉文章之顯晦蓋亦有然者甚乎其爲難也元之世
文好瞻蔚論者謂南賦理而北頌剛格致頗不同文儒
善以才自馳騁晚值改物濡化更務本實蓋文之不可
泯者若吳興夢麟沈先生其人歟先生精易學舉後至
元己卯鄉薦授婺源州學正遷武康令至正多故解官
歸歸安花谿故里時誠意伯劉公遊宦閩浙與世齟齬

每相依谿上嘗寄贈云杜陵老去詩千首陶令歸來酒
一罇其評品許與至矣國初以賢良官徵先生辭疾不
復仕退以詩文自娛三校文閩浙再同考會試高廟禮
重之而稱爲老試官年垂九而沒先生博學厚積得志
之日少隱處之日多感遇酬應富盈卷軸有花谿集藏
于家尙論文事可謂老而成矣不意家罹禍子孫謫戍
北鄙集遂散逸近歲先生之玄孫刑部郎官清錄囚南
畿過故郡訪求士夫家錄得今本什一千百耳珍藏惟
謹請言以弁其首予謝病索居乃縱觀焉馳狎仙禽迴


翔于野未見凌霄之勢然羽儀楚楚精神峻逸自是出
塵物也聞翰苑鉅儒欲選類國朝文字其能遺於斯集
哉予喜先生之有遇且彰清之能孝不辭而序之弘治
六年癸丑秋九月朔賜進士第資善大夫致仕刑部尙
書莆田彭韶書

湖州府志

沈夢麟字原昭歸安人少有詩名博通羣經尤邃於易元至元間以明經領鄉薦至正間由婺源州學正遷武康縣尹以疾辭隱居花溪益肆力於詩文薦紳先生多推許之入明以賢良徵不仕太祖聞其績學聘爲京闈考官校文闕浙終不受爵年九十三卒夢麟爲趙文敏嫺家傳其詩法有盛唐風時人稱爲沈八句有花溪集

行世

王志明參花溪集
靜志居詩話



欽定四庫全書總目提要

花谿集三卷

兩淮鹽政
採進本

元沈夢麟撰夢麟字原昭吳興人舉後至元己卯

鄉薦授婺源州學正遷武康令至正中解官歸隱

明初以賢良徵辭不起應聘入浙閩校文者三爲

會試同考者再太祖稱之曰老試官然知其志不

可屈亦不强以仕年垂九十而卒夢麟以前朝遺

老不能銷聲滅蹟自遁於雲山煙水之間乃出預

新朝貢舉之事此與楊維禎等之修元史胡行簡

等之修禮書其蹤蹟相類以較丁鶴年諸人當降
一格然身經徵辟卒不受官較改節希榮者終加
一等仍繫諸元曲諒其本志也是集爲其元孫江
西按察司僉事清所編凡詩文四百二十四篇夢
麟與趙孟頫爲姻家傳其詩法七言律體最工時
稱沈八句劉基早與之遊嘗寄贈曰杜陵老去詩
千首陶令歸來酒一罇其文其人具見於是矣

吳興沈夢麟先生花谿集卷之一

江西提刑按察司按察使邑人陸珩編

副使郡人吳瓊校正

賦

清平山賦

夫何清平之山鬱鬱蒼蒼來神秀於天目萃佳氣於錢塘浮紫蓋而軼雲雨吐金井而浚朝陽豈天造而地設將俟時乎發祥爾其盤迴怫鬱坡陀衍迤襟帶乎三江磅礴乎九地壯吳越之雄藩應斗牛之躔次翼然若鳳

皇之騫騰奮乎若蛟龍之最屨若乃林霏歛夕爽氣澄
空鏘百泉之琴筑涵萬谷之笙鏞散天香於琪樹探月
露於珠宮茲山之爲清所以沛甘澤而振皇風也旣坦
旣夷不陂不側鏹嶮峇之巖崖翦蒙茸之荆棘布黃金
以爲地展白雲以爲席茲山之爲平所以息干戈而奠
邦域也其東則天塹壁立海門中開納日月之出入通
潮汐之往來眇靈槎于滄海接仙袂于蓬萊其南則神
禹之穴句踐之區山千巖其競秀水萬壑而爭趨帆落
西陵之渡歌回遠浦之漁西望則靈鷲之峯呼猿之洞

聳樓閣之驚飛銅鼓鐘之疊送瀉千頃之玻璃亘六橋
之蟬螻北望則萬室鱗次百廬棋布塞車馬於康莊聚
貨財於商賈薇垣拱宸極之尊柏府肅秋霜之署蓋嘗
登高眺遠覽今撫昔感鴟夷之忠魂弔祖龍之荒迹射
潮之鐵箭沈沙艤浙之餘腥遺石老孤山之梅梢淡蘇
隄之柳色雲昏葛領之青月冷岳墳之碧慨往事之銷
沈漠口如長空之鳥沒也地蹙吳會天開

聖朝黃風遠播陰冷潛消閔海隅之黎庶分廊廟之夔
臬偉和甯之忠獻宣德澤而甄陶疏河流之活活賑飢

民之嗷嗷藹甘棠之蔽芾聿新廟之嵒巖猗歟相君世
濟其美帝念南邦民亦勞止汝其往哉繼汝先志相君
是來承命弗替起疲癯於羣生化強梁於四裔妖氛廓
清文教漸被思前王而不忘崇梵宮而葳祀赫祠宇之
再新勒貞珉而昭示口吉晨良禮備樂彰牲牷肥腍黍
稷馨香集賓僚之濟濟沛文物之洋洋化民德而歸厚
衍流祚於無疆嗟惟此山俯仰口古表清平之嘉名興
邦家而永固故覽茲山之清者可以滌蚩尤之霧履茲
山之平者是以遵皇極之路小子何知明時欣遇奮藩

籬之弱翼勉登高而作賦冀天風之我吹附青雲之高
步

金雞竿賦

太白流英昂星宣精妙二氣之軫輶屹一柱而崢嶸近

日月之精華宅天地之清甯此非金雞之竿所以肆赦
而得名者乎方其星沈麗水天雨櫟陽黃龍韜其瑞彩
白藏耿其寒芒質從革而不變材遇礪而愈彰若乃牟
麤委赤瓜子隕黃霜菊爛其有色月桂屑而無香圓釵
肖乎馬蹄紫鏐嗽乎禽吭闡富媼之珍祕哭口母之灝
蒼爰篚而筐爰襲而藏九牧貢於內府三品來乎維揚
于時鶉火夜伏雞星曉升遙桃都之孕秀騰搏桑而長
鳴想其金珠朱冠丹頸夜膺蒼距矯攬彩尾翹騰赤玉
刻彪炳之文紅綃翦爛編之翎啄天田之稼穡飲咸池